

Кижини тоолаганынаң ужун декларациязы

1948 чылда улуғ кырлаш айдынъ 10 күнүнде Генеральный Ассамблей, 217 А(III) кижини тоолаганының ужун декларациязын ал-кел, резолюцияба аны угъустылар.

ПРЕАМБУЛАЗЫ

Парчын кижини тенъ тоолабазабыс, пош, шын, абыр чадыйыбыс пар полбас теп, көрүп;

Кижилерди кыстап-кел тоолабанчыабыста, улуғ қан төгүлүп, кижиде сағыжы қырыл турча теп, көрүп;

Наа чадыйыбыс, ол парчын кижиде айдарын айдар, сананғанын ажар чадыйы, анаң аара кижиде қоруқпан, керексинмен чөрер чадыйы ползын теп, көрүп;

Кижилерди улуғ тоолап, ыларға чозақ полушсын теп, қыстаған кижилер қыстапчыған кижилердең тоғра турбазыннар, өдүрүшпезиннер теп, көрүп;

Ақ чарықта чатчыған чон-қалықтар, өзере тартышпан, арғыштаныш полып, чатсыннар теп, көрүп;

Пириктеген қалықтары парчын кижиге улуғ тоолағанынаң, парчын кижини чадыйының қыймадынға, эр кижиде тижиде кижиниң тенъ полчығанынаң пүтчадып, позуның Уставқа аны пастырып, кижиде аразындағы чадыйы чакшаарақ пол-парзын теп, санағанмысқа көрүп;

Пириктеген қалықтардың қааннары парчын кижиге улуғ тоолаганының керегин, чадыйыбыс пош поларының керегин, жожа қатыш-келип иштерге сөс пергенин көрүп;

Парчын кижиге улуғ тоолағаны, парчын кижиниң пош чатчығаны қайда да, кемге да тың керек, анаң аара пис по айтқан сөстерибистең шыкпасқа тың керек полғанын көрүп;

Генеральный Ассамблей

парчын кижиге улуғ тоолағанынаң, пош чадыйынаң ужун по Текши декларациязын угуза чарлапча; парчын қаан, қалық, кижиде по текши декларацияда пасқанын иштезиннер теп, қатқа үргенип, кижилер аразында чөрүп, парчын кижиге улуғ тоолағанының, пош чадыйыбыстың керегинге полушсыннар, улуғ пайрамнарда, пашқа қалықтарба, эзе, пириктеген қалықтарба ылардың туңма қалықтарба чылыжып, парчын кижиге улуғ тоолағанын, парчын кижиде пош чатқанын чағдаттырып, иштеттирип этча.

Статьязы 1

Парчын кижиде, по чарыққа туғчадып, тең, пош туғча. Кижилер сағыштығ, ақтығ туғчалар, кижилерге пашқа кижилербе арғыштаныштарға керек.

Статьязы 2

Парчын кижиде пашқа кижилербе, ылар қайдығ да чон-қалықтанъ шыққанынаң, тижиде ба, эр кижиде ба полғанынаң, қайдығ да тилбе чооқташқанынаң, қайдығ да партиядаң шығара сананғанынаң, пай ба, чоқ кижиде ба полғанынаң пирда көрбен, тең улуғ тоолаған ползын, пашқа кижилербе тең пош чатсын.

Статьязы 3

Парчын кижиде пош чатсын, аны кем да тегбезин.

Статьязы 4

Пирда кижиде қул полбазын, қайдығ да кижини қул эдерге, қул эдип садырға чарабас.

Статьязы 5

Пирда кижиде пашқа кижиге шаптырбазын, қыстаттырбазын, моғаттырбазын, қайде да чабал эттирбезин.

Статьязы 6

Парчын кижиде, ол қайда да чадып, пашқа кижилерге улуғ тоолаттырзын.

Статьязы 7

Парчын кижиде, ол қайдығ да чозақтығ, тиллиғ полза, по декларацияға көре, чозақ аны пашқа кижилербе тең көр-турзын.

Статьязы 8

Парчын кижиде, аны улуғ тоолабанчығаннарында, чарғыға кирзин, ааң керегин чарғычы маттап көрүп, оң этсин.

Статьязы 9

Пирда кижиде ээде ле туттырған полбазын, ноо-ноо чердең шығара сүрүлбезин.

Статьязы 10

Парчын кижиде, аны чарғыға түжүргеннеринде, ажилдыра, шын чарғы чарғылазын.

Статьязы 11

Парчын кижиде, ол қыйал эткен теп найағаннарында, ааң қыйалы эткенин оң чарғычы қат шығарбанче, ол қыйалы чоқ кижиде теп адалзын.

Ноо да кижиде, тем-тем алында қыйал эдип, наа ла шыққан чозаққа көре, чарғыға түжүрбезин. Түрбеде одурып, шығып, ам, наа ла шыққан чозаққа кре, полғанынаң қадығаарақ этпезиннер.

Статьязы 12

Ноо да кижиниң сағыжын сананғанынаң, семьязы чатчаң эминге, ааң пасқан қатқа, ааң төлдиң ағынаң кем да кирбезин, арлашпазын.

Статьязы 13

Парчын кижиде қайаға чөрерге саназа, анда чөрзин, қайда чадарға саназа, анда чатсын, қайдығ да қаан черинде.

Парчын кижиде позуның черинең қайаға саназа, аға парзын, айланар полза, позуның черинге айланзын.

Статьязы 14

Парчын кижиде, аны черинең шығара сүргеннеринде, қайаға да тезерге саназа, тессин.

Кижиде тезе өдүрзе-оорлаза, пириктеген қалық организацияның чозақтарынаң көре, аға полужарға чарабас.

Статьязы 15

Парчын кижиде гражданстволығ ползын.

Кемге да ааң гражданствозын ээде ле алыб-аларға чарабас.

Статьязы 16

Эр кижиде тижиде кижиде, эр шенинге четкеннеринде, ноо да небеге, шырайынаң, қудайға пүткенинге, чон-қалығынаң көрбен, алышсыннар.

Өзере ле сананыш-келип, алышыннар.

Семья, ол қалықтың пөлүгү. Анаң аара қалық аға полушсын.

Статьязы 17

Парчын кижі чағысқа да, кемме да пирге да полза, эм-мал тутсын.

Кемнең да тутқан эм-малы пашқа кижібе ээде ле алдырбазын.

Статьязы 18

Парчын кижі ноода ужун саназа, анаң ужун саназын, қайдығ да құдайға пүдерге саназа, аға пүтсин, чағысқа да, кемме пирге, қожа да, кижилердің көзүнче да, кижиге көрдүрбен да позуның чозағын тутсын.

Статьязы 19

Парчын кижі ноо ла санарға саназа, аны саназын, ноо ла айдарға саназа, аны айтсын, ноо ла тилерге, табарға саназа, аны тапсын, кем да аны қайдығ черде да тоқтатпазын.

Статьязы 20

Парчын кижі абыр чыылыжарға саназа, абыр чыылышсын.

Кемни да күше чыылысқа киридерге чарабас.

Статьязы 21

Парчын кижі қаан-төрези керегинге арлажарға саназа, позу да, позуның кижіны ызып, арлашсын.

Парчын кижі, позуның черінде қаан-төрези керегинге кирерге саназа, пашқа кижилербе тең кирзин.

Каан-төрези қалықтың санағанын уқчалар, ол қалығы қаан-төрезинге тутча, қалықтың санағаны пош уғулзын.

Статьязы 22

Парчын кижі, қалық аразында чөрүуп, чақшы чадарға, қатчы поларға, пай поларға керек небелерин алзын.

Статьязы 23

Парчын кижі қайда иштерге саназа, анда иштезин, чақшы черде иштезин, иш чоқ қалбазын.

Парчын кижі, пирда қыстатпан, иштеп тең үлүш алзын.

Парчын иштепчыған кижі, позу, ааң семьязы чақшы пай чадарға, чедер ақча алзын.

Парчын кижі позуның керегинең ужун профсоюз пүдүрзин, пашқа профсоюзстарынға кирзин.

Статьязы 24

Парчын кижі тынанарға керек полза, тынанзын, ойун ойнарға саназа, ойназын, ужи-пажы чоқ тем иштебезин, отпусктығ ползын.

Статьязы 25

Парчын кижі аға керек чиижин чиизин, керек кебин кессин, керек эминде чатсын, қазықтығ поларға, пашқа да керек небени алзын, иш чоқ пол-парза, қаар-парза, палығлығ, ағығ пол-парза, пашқа да шедиктерге кир-парза, чедер ақчалығ ползын,

Корсақтығ эпчи, кичиғ пала матап полуштығ ползыннар. Сурас паллар аба-ичелиғ палларба тең ползыннар.

Статьязы 26

Парчын кижі қатқа үргензин. Ақча төлебен қатқа школда үргензин. Төрт класқа төбнче парчын пала үргензин. Техникалығ, профессиялығ школларда үргенерге саназалар, үргензиннер. Институтқа үргенерге саназалар, сағыш четсе, үргензиннер.

Қатқа үргенип, кижилер позуның қуттарын ашып көрзиннер, пашқа кижилерди тоолазыннар, религияларынға, чон-қалықтарынға көрбен, тоолазыннар, пириктеген қалықтардың организациязының керегин эдип, абыр-қазық эдип чатсыннар.

Аба-ичелери позуның кичиғ палларынға қатқа үргенер черин қайда саназалар, анда табалзыннар.

Статьязы 27

Парчын кижі чүлүң керегинге кирерге саназа, кирзин, пилим керегинге кирерге саназа, кирзин, иштеген пайын алзын.

Кем да, пилим небени, кер сөс, чоғаш пас-салза, ааң иштегенин улуғ тоолазыннар, асқайлабазыннар.

Статьязы 28

Парчын кижі қалықтар, кижилер араларында, по декларацияда пасқан небелерге көре, улуғ тоолаттырзын, асқайлатпазын.

Статьязы 29

Парчын кижінің ааң позуның чон-қалығынаң алында өдүш пар; ол өдушти чонқалығынға төлеп, кижі позуның құдын ашылып, ырызын-үлүжин алча.

Парчын кижінің, ол пош, тең полчығанда, аны чозақ ла тоқтатча; ол чозақ пашқа кижилердің пожын, тең полчығанын тоолапчыған чозағы.

Парчын кижінің пожи, тең пириктеген қалықтар организациязының керегинең тоғра полбазын.

Статьязы 30

По декларацияда пасқан небелери пир ле қаан черин, пир чон-қалықтың керегин тутқаң небелери эбес; кемге да, по декларацияда пасқан небелерин чоқ эдерге чарабас; по декларацияда пасқан небелери, кижилерге полуш-келип, пистиң чақшы чадыйыс пүдүрзиннер.

Авторы перевода

Кандидат филологических наук, член Союза писателей России, с.н. сотрудник Института филологии СО РАН Л.Н. Арбачакова, Кандидат филологических наук, член Союза писателей России, доцент кафедры шорского языка и литературы Г.В. Косточаков.